

Estage de «trempeo lenguistico e culturalo»
en Lengo Prouvençalo

**Óubradou : Vitour d'Hupay, un de
la Revouluciou (1746-1818)**

*Pèr
Jan-Glaude
Roux*



*Retra de
Vitour
d'Hupay
vers
1790*



La bastido Santo-Catarino

Documentacioun realisado, emé la countribucioun de l'animatour,
pèr lou Secretariat Federau dis Assouciacioun Parlaren,
1 av. de la Foire (Champfleury) 84000 Avignoun
Tel 04 90 86 27 76 - E.mèl : jc.roux.regordane48@gmail.com
e l'Assouciacioun sestiano A cantari

19.06.2021

Estage de z-Ais

■ Prouvènço es un país que s'ounouro de persounage d'eicepcioun. I siècle 18 e 19 avèn agu Frederi Mistral e bèn d'àutris aparaire de noste gènt parla.

Au siècle 17, à la Tourre d'Egues (1), en sud Luberon, nasquè en 1746 un jovenome que sa famiho ié diguè Jòusè, Aleissandre, Vitour. Es Vitour, fin finalo, que sara lou noum lou mai emplega e couneigu.

Vitour èro d'uno famiho vilajano e bourgeoiso, li Dhupay, qu'avien un doumaine famihau, la bastido Santo-Catarino, à la Tourre d'Egues (1). Sabèn pas d'ounte sourtien li Dhupay, qu'es pulèu un noum d'oustau qu'atrouvan emé la formo Hupay presènto encaro vuei dins qu'asi tout lou Vaucluso.

Au Pue Santo-Reparado, es esta signala uno Eisabé Madaleno Hupay, lou noum de si gènt estènt escri Upay, D'Upay o Dupail. Belèu que lou «D'» s'es apoundu à Hupay, à la Tourre d'Egues, estènt que menavon de terro.

À 17 an : proumié tèste sus l'ecounoumìo ruralo

Sabèn pas grand causo de la jouinesso de Vitour Dhupay. Pamens, sèmblo bèn qu'aguè uno educacioun counsequènto, dins un cadre famihau que couneissié e seguissié lis idèio nouvello, e qu'èro belèu d'ourigino vaudeso. D'efèt, à 17 an, Vitour coumencè à escrieure si proumié tèste sus l'ecounoumìo ruralo.

Erian en 1763. Vitour Dhupay seguiguè l'eisèmplo dóu baroun de la Tourre d'Egues, un Jan-Batisto de Bruny, que s'interessavo à la valourisacioun di terro e qu'avié uno di mai gràndi biblioutèco de l'epoco.

Vitour, pamens, remetra en causo li richesso di Bruny, baroun de soun vilage.

Vitour Dhupay seguira pièi, coume soun vesin lou marquès de Mirabeau, un autre prouvençau, lou mouvamen fisioucrato que prounavo uno ecounoumìo foundado sus l'agriculturo.

Pèr éu, l'essenciau èro de faire prouspera li terro famihalo de la bastido Santo-Catarino.

Vido en coumunauta o «coununisto»...

Sian avans la Revoulucioun de 1789 : Dhupay devèn un disciple de Rousseau. S'agis d'aguè uno vido simplo, liuen dóu tarabast di vilo. Legis li filousofe di Lumiero e, es aqui, forço jouine, que decidè de metre un jour en coumunauta l'ensèn de si bèn em'aquéli de si vesin.

Èro l'idèio d'uno vido en coumunauta, d'aqui l'emplé dóu mot «coununisto» qu'eisistavo despièi lou siècle 12en dins lou sèn de «coununauta di bèn».

Vitour d'Hupay



Soubro de la porto dóu castèu de la Tourre d'Egues, en Luberon



Vitour d'Hupay devèn noble

En 1777, Vitour croumpè la bastido de Puget, à Fuvèu, emé si 220 eitaro, bastido qu'èro devengudo uno granjo toumbado en rouino. Devenguè ansin counsegnour de Fuvèu à 24 an.

Desenant fasié partido de la noublesso e soun noum devènguè : Vitour d'Hupay, emé la particulo, encaro que lou noum D'Hupay siguèsse pas presènt dins la tiero di famiho counsulàri e di noutable dóu País de-z-Ais, bord que D'Hupay vivié en deforo de la vido sestiano, que lou prenien pèr un ouriginau, e qu'avié ges de cargo au Parlamen de Prouvènço.

Desenant Vitour d'Hupay passara soun tèms entre z-Ais e Fuvèu en ivèr e, à la bello sesoun, à la Tourre d'Egues dins la bastido parentalo de Santo-Catarino menado, proubable, pèr soun fraire, bord qu'en 1791, l'Assemblado Naciounalo lou qualificara de «Dhupay, aîné», estènt que, Revoulucioun óubligo, avié abandonna la particulo e soun titre de noublesso.

À Puget, vai legi li tèste di filousofe : Rousseau, Diderot, Montesquieu, Restif de la Bretonne,



Bastido de Puget à Meiruei vuei

Bernardin de Sant-Pèire, Madamo de Staël, en cercant de metre en acioun si pensado.

Se donè tambèn un autre novèu noum pèr sis escri : Moïse-Platon-Jésus-Pline Dhupay.

En 1777 D'hupay publiquè soun proumier oubrage : *Projet de communauté philosophe*. Souvetavo, en seguido, de recampa à la Bastido de Puget un cièucle d'ami pèr ié mena uno vido en coumunauta.

En 1785 D'hupay vai se defini coume estènt un autour «coununisto», ajeitiéu qualificatiéu représ pèr Restif de La Bretonne (1734-1806), pièi pèr Gracchus Babeuf (1760-1797) e que fara flòri.

Quouro la Revoulucioun de 1789 espetè, Vitour d'Hupay s'entousiasmè pèr lis idèio nouvello. Abandonnè lou noum noble de D'Hupay e reprenquè soun noum d'oustau : Dhupay. Vai courrespoundre emé Mirabeau e Bernardin de Sant-Pèire. Mandara plusiour proujèt d'educacioun naciounalo, pèr ié douna de counsèu e de moudèlo de gouvèr, à l'Assemblado naciounalo, à Paris.

De D'Hupay à Dhupay aîné

Dins sa sesiho dóu 11 d'Avoust de 1791 presidado pèr Aleissandre de Beauharnais es esta nouta que :

«Le Président annonce que le sieur Dhupay aîné, fait hommage à l'Assemblée de deux ouvrages intitulés : le premier «Projet pharmaceutique constitutionnel»; le second : «Doctrine, exemples et Prières de la Bible». (L'assemblée agréé ces hommages et ordonne qu'il en sera fait mention dans le procès-verbal. (Nouta : èron esta escri en 1789).

D'àutri proujèt de Dhupay saran tambèn nouta en 1790, 1792, 1793.

Militara pèr la supressioun dóu maridage que vesié coume uno formo de proupieta counjugalo tiranico.

Mai d'Hupay escapè au «rasour naciounau»

Li revoulucioun, coume se saup, devoron sis enfant. Aquelo de 1789-1793 manquè pas au rendès-vous : Noble, Aleissandre, Jòusè, Vitour d'Hupay, fuguè engabioula souto la Terrou e sa bastido de Fuvèu fuguè pihado.

Escapè pamens au «rasour naciounau». Se disié noum coumprés, lou prenien pèr un fadòli. Escriguè un pau souto l'Empèri e mouriguè pasiblamen à Fuvèu en 1818, à 72 an. Se doutavo pas que lou mot «coununisto» qu'avié resusscita pèr crea sa coumunauta de filousofe, anavo aguè d'àutri terribli fourtuno. Es bono-di de Sestian de vuei (2) que D'Hupay, qu'èro bèn óublida, es esta tourna-mai ounoura. Li bastido, que soun entre d'àutri man, eisiston toujours e si libre se podon aro trouba(3).

1) Tourre d'Egues. Noum prouvençau ancian de la Tourre d'Aigo, bord que se disié «egues» (Aiquerii L.) en resoun de l'estang de la Boundo qu'es proche de La Tourre d'Egues, La Mouto d'Egues e Cabriero d'Egues.

2) En 1990, Micoulau Flippe, que fasié de recerco sus li famiho parlamentàri sestiano, coumencè à s'interessa à Vitour d'Hupay.

3) En 2009 redescuberto à z-Ais, vers de particulié, d'un manuscrit de 20 pajo data de 1772-1773, que douno d'entre-signe sus l'enfanço de d'Hupay, soun envirouno famihalo, soun maridage e la croumpo de Puget pèr éu. 9 de sis obro soun à la BNF.

- Bernat Deschamps : ai fa qu'auqui recerco sus D'Hupay. Sus li site de genealogio : rèn, mai dins lis archiéu despartamentalo :

- Ai trouba l'ate de batisme dins la parròqui de la Tourre d'Egues. La famiho èro dounc catoulico à-n-aquelo epoco. Jòusè, Aleissandre, Vitour Dhupay èro nascu e bateja lou 8 de Mars de 1746.

Paire : Bernardin Dhupay. Maire : Gabriello Destienne dóu Bourguet

Peirin : Jòusè Legrand, noutàri reiau.

Meirino : Mario Terèso, de Castellano, dóu Bourget Destienne. Ate de décès à Fuvèu : qualifica de proupieta. mort lou 25.10.1818. Soun paire èro encaro en vido, sa maire Gabriello èro morto.

- D'Hupay èro amouiera emé Mario-Roso Testanière (devendra de Testanière), nascudo vers 1753, morto au Puget, Fuvèu, lou 15 de Setèmbre de 1847 à 94 an. Maridage belèu anterior à 1775.

D'Hupay a agu 4 enfant :

Emilio Eleounoro Soufio Dhupay maridado emé Andriéu Bally. Morto au Puget lou 17.08.1831, 56 an (nascudo vers 1775).

Julio Roso Vitourino Dhupay, femo de Nouvè Sicard, morto au Puget le 30.11.1826, 45 an (nascudo vers 1781).

Lobie Antòni Dhupay, mort au Puget lou 14.06.1809, à 23 an (nascu vers 1786)

Un drole, en vido en 1826, e belèu après 1831. BD

